



Komunikadu Imprensa

28 Agostu 2013

Arguidu ba kazu abuzu konfiansa hetan pena prizaun tinan 3 suspende ba tinan 4 no selu Multa US 5.000,00

Iha 25 Agostu 2013, Tribunál Distritál Suai hala'o julgamentu movél hodi lee leitura akordaun ba kazu abuzu konfiansa ne'ebé involve arguidu João dos Reis hasoru NGO Moris Rasik hanesan vítima. Kazu ne'e akontese iha 20 Novembru 2007, iha Distritu Ainaro.

“Desizaun ne'e kontinua prova ba públiku katak kualker aktu sira ne'ebé involve abuzu konfiansa sei hatan no simu responsabilidade tuir lei haruka. Ne'e hanesan lisaun importante tebes iha kontestu hari'i nasaun, tanba prosesu hirak ne'e atu asegura katak ema hotu ne'ebé involve iha kualker aktu krimínál ruma sei la halai-ses husi responsabilidade krimínál,” dehan Diretór Ezekutivu JSMP, Luis de Oliveira Sampaio.

Ministériu Públiku akuza katak iha 20 Novembru 2007, arguidu nu'udar funsionáriu iha NGO Moris Rasik utiliza osan ne'e hodi benefisia nia interese pesoal ne'ebé NGO Moris Rasik atu ajuda hodi fó kréditu ba ema faluk sira.

Relasiona ho aktu ne'e, Ministériu Públiku akuza arguidu kontra artigu 256 Kódigu Penál kona-ba abuzu konfiansa ne'ebé ninia moldura penál hetan pena prizaun tinan 3 ka multa.

Arguidu deklarara katak nia pruntu selu fali osan ne'ebé mak nia utiliza tiha ona durante ne'e bazeia ba akordu ne'ebé mak sira halo ona katak arguidu sei selu osan sira ne'e iha tinan 1 nia laran. Bazeia ba akordu ne'e NGO Moris Rasik aseita ho arguidu nia deklarasaun ne'e.

Iha alegasaun finál Ministériu Públiku, husu ba tribunál atu kondena arguidu ho pena prizaun tinan 3 suspende ba tinan 5 no selu multa ba NGO Moris Rasik ne'ebé arguidu prejudika ona.

Defeza husu ba tribunál atu aplika pena ne'ebe kma'an ba arguidu tanba arguidu konfesa loloos tuir faktus no provas ne'ebé mak nia halo.

Audiénsia julgamentu ne'e prejide husi Juises Koletivu Dr. Costâncio Barros Basmery. Dr. Pedro Raposo de Figueiredo no Dr. Argentino Luisa Nunes, Ministériu Públiku representa husi Dr. Felismino Garcia Cardoso no arguidu hetan defeza husi Dr. Marçal Mascarenhas husi Defensória Pública.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883|77295795 Website: www.jsmp.tl

Facebook: www.facebook.com/timorleste.jsmp

Twitter: @JSMPTl